

Sepohon pisang tumbang ke tanah. Dedaunnya yang lebat terkulai ke dalam parit yang mengalir air gunung yang tidak tahu berhenti. Sementara batangnya terdampar di tanah. Setandan pisang ranum yang sebelum ini bergayutan, kini terpelanting dan tersadai di atas jalan yang bakal diturap. Tetapi tidak ada sebiji pun pisang kepok yang tinggal. Habis direbut budak-budak Kampung Tapai.

“Kurang ajar! Semua pasal traktor keparat tu. Kau nak buat jalan, pokok aku jadi mangsa!” Dengan menghunus parang yang biasa digunakan untuk menetak tandan pisang, Mamod bergegas ke rumah penghulu. Tenang dan damai air muka penghulu. Sudah lumrah dengan hal sedemikian. Penghulu bersuara dengan nada yang meyakinkan.

“Mod, kenapa kau marah-marah. Kontraktor tu korek di tepi. Sikit pun, dia tak usik kawasan kau. Kau tak boleh tuduh pokok pisang kau tumbang pasal kerja binaan jalan tu!”

“Mereka korek di sebelah, mestilah kebun aku terjejas. Akarnya terganggu, jadi tumbang pokok pisang aku!”

“Itu tuduhan kau semata-mata. Kau tak ada bukti yang pokok pisang kau tumbang sebab kerja jalan yang kita buat,” penghulu Razali bertingkah.

“Memang aku tak boleh buktikan sebab aku tak tahu kerja jurutera. Tapi pakai akallah.” “Kalau kau tak ada bukti, kau tak boleh menuduh!” tegas suara penghulu.

“Tak semua benda yang betul, perlu bersandarkan pada bukti,” tegas Mamod. “Dan ada bukti, tak bermakna kau betul! Kau tengok para peguam, mereka cari bukti untuk tumbangkan kebenaran!”